



SYNDICAT DES PERSONNELS DE L'ÉDUCATION EN GUADELOUPE

LANG KRÉYÒL AN PLAS A-Y AN LÉKÒL-LA. SPEG MOBILIZÉ É KA GANNYÉ KONBA !

SPEG ka goumé dèpi tanto pou rèkonésans, é ansèyman a lang kréyòl andidan lékòl Gwadeloup. Pouvéré, alèkilé, lansèyman a kréyòl poko jen byen rantré é sizé poubon adan on politik akadémik ki dwètèt komansé an tilékòl pou rivé jis linivèsité. Toutfwazékant, SPEG pé yenki kontan lèwwwè désèwten biten ka mélyoré é ka pèwmèt lansèyman a kréyòl fè douvan, piplis lèwwwè SPEG goumé pou sa.

WI, ÉTIDYAN KI AN BTS PÉ FÈ KRÉYÒL AN LV2 OUBEN ÒPSYON.

Lanné pasé, an 2019, SPEG lévé-gawoulé douvan on lenjistis otila on étidyan enskri an BTS té andwa pran tout dèt lang réjyonnal annisòf kréyòl. Konfèdmanti, adan tèks-la yo té oubliyé mè kréyòl.

Kifè SPEG pòté bon mannèv pou mè on lòd adan kalpata-lasa. SPEG hélé sénatè é dépitè Gwadeloup, pou yo mandé Ministè a Lédikasyon kont parapòt a on sitiyaasyon ki pa té dwètèt.

Alòskifè, an févriyé 2020, on dokiman ofisyèl a ministè vin parèt é ka di pa koté 2022, an BTS on étidyan ké andwa pran kréyòl an LV2 oben an òpsyon

Kidonk, kèlanswa sitiyaasyon a étidyan-la, asiré-pa-pètèt ké ni on solisyon pou i pasé kréyòl an LV2 oben opsyon.

Mi référans a tèks-la : BO ofisyèl n°6 févriyé 2020

Menmsi SPEG sav byen kè sa ki an bèk pa an fal, nou pé di woulo-bravo pou konba-lasa padavwa kréyòl dwèt an lékòl-la dèpi lékòlmabo jis linivèsité.

WI, SPEG GANNYÉ 3 KRÉYASYON A PÒS KRÉYÒL ANPLIS POU KOLÈJ É LISÉ.

Dèpi lanné é lanné, onlo ti mòso lè ka parèt an “BMP” andidan akadémi Gwadeloup san janmen ladministrasyon pòté on ganm pou kréyé pòs poubon. Kifè, onchaj kolèg ka vin trouvé-vo TZR, on sitiyaasyon ki près ka vin nòwmal dèpi déotwa lanné.

Sé konsa, an dènyé CTA pòs, lè 5 jen, SPEG montré-vo ola é kijan transfòwmé 6 “BMP” an pòs définitif. Avè sa, SPEG rivé raché kréyasyon a 3 pòs kréyòl anplis ki sa yo té ja prévwa pou larantré 2020.

SPEG KA KONTINYÉ RÈVANDIKÉ :

- on politik séryé é daplon pou dévlopman a lansèyman a kréyòl dèpi tilékòl jous linivèsité.
- on lansèyman a kréyòl chouké andidan skolarité a zèlèv é étidyan Gwadeloup.
- ON LANSÈYMAN A KRÉYOL POU KRÉYOL LIMENM É PA POU SÈVI PONDÒT LANG BIKI.

Konba dèyè poko mannyé ! SPEG KA RÉTÉ VÉYATIF

Lapwent, 22 jen 2020
Konsèy Sendikal SPEG



5, Immeuble DILIGENTI Assainissement- BP 182 – 97164 POINTE-à-PITRE cedex

☎ : 0590 91 05 32 / 📠 : 0590 83 90 42 / e-mail : spg@wanadoo.fr